

24 AUG 1998

MAHATHIR BUKA PUSAT SIARAN ANTARABANGSA

KUALA LUMPUR, 24 Ogos (Bernama) -- Datuk Seri Dr Mahathir Mohamad hari ini telah membuka Pusat Siaran Antarabangsa (IBC) berharga RM68 juta, yang akan menjadi nadi siaran television ke seluruh dunia bagi Kuala Lumpur '98 Sukan Komanwel ke-16 bulan depan.

Radio dan Televisyen Malaysia (RTM), selaku hos penyiar Kuala Lumpur '98, telah menubuhkan pusat itu yang terletak di kawasan Angkasapuri di sini.

Perdana Menteri juga telah melawat sekitar pusat itu dan melihat kemudahan terkini yang disediakan. Liputan Sukan Komanwel dijangka dapat diterima oleh kira-kira 500 juta penonton di seluruh dunia.

Sebanyak 15 stesen penyiaran antarabangsa dan empat stesen tempatan akan menggunakan kemudahan IBC untuk liputan sukan itu.

Antaranya ialah Perbadanan Penyiaran British (BBC), Channel 9 dari Australia, TV New Zealand, TV Afrika Selatan di samping stesen television dari Brunei, Singapura dan Sri Lanka.

Kira-kira 2,000 wartawan television, juruteknik dan jurukamera dijangka membuat liputan sukan yang akan berlangsung pada 11-21 Sept itu.

-- BERNAMA

MAM NMO